

Allakkerineq pillugu Inatsisartut inatsisissaattut siunnersuut**pillugu****Attaveqarnermut Ineqarnermullu Ataatsimiititaliap****ISUMALIUTISSIISUTAA****Siunnersuutip aappassaaneerneqarnerani saqqummiunneqartoq**
Ineqarnermut, Attaveqarnermut Angallannermullu Naalackersuisumit

Ataatsimiititaliaq suliarinninnermini ukuningga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Olga P. Berthelsen, Inuit Ataqtigiit, siulittaasup tullia
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Anders Olsen, Siumut
Inatsisartunut ilaasortaq Malik Berthelsen, Siumut

Ataatsimiititaliap siunnersuut ulloq 1. marts 2011-mi siullermeerneqareermat misissorpaa.

Siunnersuutip imarisaa siunertaalu

Inatsisip ullumikkut atuuttup eqaannerulersinnissaa naleqqussaruminarnerulersinnissaalu siunnersuummi uani siunertarineqarpoq. Inatsisartut peqqussutaat kingulleq 2004-mi aalajangiiffiqineqarmalli allakkanik poortukkanillu ingerlatitseqqittarneq allanngoriartupiloorsimavoq. Inatsit pisinnaatitsinnermut inatsisaavoq nalunaarullu tassunga tunngatinneqartoq malillugu allakkerinnermi sullissinerit iluarsiviginissaannut Naalackersuisut piginnaatinneqarput. Allakkerinnermi atugassarititaasut Nunattalu Allakkeriviata sulinera ullutsinnut naleqqunnerulersillugit iliuuseqarnissaminnut Naalackersuisut inatsisikkut periarfissinneqarput. Taamaalilluni Nunatta Allakkerivianut tunngaviusumik suliasarititaasut allanngortinneqanngillat.

Inatsisartut siunnersuummik siullermeerinninnerat

Partiit tamarmik siunnersuut tapersersorpaat, allakkerinermi sullissinerit inuiaqatigiit ineriartornerat malillugu iluarsivigisarnissaannut inatsisip nalunaarutillu tassunga tunngasup periarfissiinissaat partiinit pissusissamisoortutut isigineqarmat.

Ataatsimiititaliap siunnersuummik suliarinninneraAllakkanik ingerlassinissamut pisussaaffimmi killilersuutit

Nunaqarfinni illoqarfinnilu qanoq pisoqartillugu allakkanik nalinginnaasunik ingerlassisoqartassanngitsoq inatsimmi § 4, imm. 2-mi 3-milu allassimavoq.

Tassunga atatillugu ataatsimiititaliap oqaatigisariaqarsoraa nunaqarfinni allakkanik ingerlassisoqassanngitsoq inatsimmi aallaaviummat. Tassa nunaqarfinni allakkanik agguaassisarnermi killilersuutit nalinginaasut pineqarput, akerlianilli illoqarfinnut tunngatillugu ingerlatsinermi aningaasaqarneq sullitanullu tunngaviusut aallaavigalugit allakkanik agguaassisoqartassasoq Naalakkersuisut Nunatta Allakkerivia immikkut ittumik aalajangersaaffigisinnaavaat, tak. Inatsimmi § 4, imm. 3. Nunaqarfiit ataatsimut isigalugit aalajangersakkami ilanngunneqannginnissaat maanna imm. 2-kkut inatsimmi erseqqissumik aalajangersaaffigineqartoq ataatsimiititaliap takusinnaavaa, tassanimi suleriaatsit atuutereersut erseqqissarneqarmata.

§ 3, imm 1, nr. 1-mut nassuiaatit

Inatsisissatut siunnersuummi § 3, imm. 1. nr. 1-imut nassuiaatini manna oqaatigineqarpoq: *”Aalajangersakkami sullissinerit ataasiakkaat suut nassiussinissamut pisussaaffimmut ilaatinneqassanersut pillugu Naalakkersuisut aalajangiinissamut piginnaatinneqarput. Tamatumunnga atatillugu sinaakkutissanik, POST Greenlandip inatsimmi § 1-imik naammassinninnissaanut ajornarunnaarsitsisussanik peqarnissaa Naalakkersuisut qulakkiissavaat. Tamatumani piumasaqaatit attuumassuteqartut tassaassapput aningaasaqarneq kiisalu sullissinermi tunngavissat. Taamaattorli aamma inuiaqatigiinni isumaginninnermilu eqqarsaatigisassat Naalakkersuisut pingaartissavaat. Tamatumunnga atatillugu allakkanik nassiussinermi kalaallit inuiaqatigiit pisariaqartitaasa qulakkeerneqarnissaasa eqqarsaatigineqarnissaa aningaasaqarnermit pingaarnerutinneqarsinnaavoq, tak. § 1, imm. 2, nr. 2.”*

Tamatumunnga tunngatillugu ataatsimiititaliap oqaatigissavaa, § 1, imm. 2-mut nassuiaatini innersuussutit ataatsimiititaliap imatut paasimmagit, tassalu inuiaqatigiinni inuuniarnermilu mianerisassat pissutigalugit Nunatta Allakkerivia amigartooruteqartillugu tamatumunnga taartisiassanik Nunatta Allakkerivia Naalakkersuisunut qinnuteqarsinnaammat.

Apeqqutit

Ataatsimiititaliap siunnersuummik suliarinninnissaanut atugassanik apeqqutit arlallit akissuteqarfigeqqullugit ataatsimiititaliap Ineqarnermut, Attaveqarnermut Angallannernullu Naalakkersuisoq qinnuigaa. Ataatsimiititaliap apeqqutaasa Naalakkersuisullu akissutaata

nuutsinneri **ilanngussaq 1-tut aamma ilanngussaq 2-tut** isumaliutissiissummut matumunnga ilanngunneqarput.

Tarsiissuteqartarnek

Tarsiissuteqartarnek maalaaruteqarsinnaanerlu, matumani ilanngullugu maalaaruteqarnissamut piffisaliisarnek pillugu maleruagassat ullumikkut atuuttut inatsimmi ilanngunneqarsimanngitsut, akerlianilli nalunaarummi ilanngullugit inissinnissaat naatsorsuutigineqartoq ataatsimiititaliap paasivaa. Tamatumunnga peqatigitillugu taarsiissuteqartarnek maalaaruteqarsinnaanerlu pillugit maleruagassat aalajangersarnissaannut pisinnaatitsinermik aalajangersakkat inatsimmi atuutilersinneqarput.

Tassunga atatillugu taarsissuteqarnissamik aalajangersakkat massakkut atuuttut inatsimmit peerneqarnerannut tunuliaqutaasut pitsaaqutaasullu pillugit apeqqutinik ataatsimiititaliap Naalakkersuisumut saqqummiussaqqarpoq. tak. **ilanngussaq 1.**

Tarsiissuteqartarnek pillugu maleruagassat aalajangersarnissaannut tunngavik pillugu apeqqut 1-imut tunngatillugu tunngaviup inatsimmi § 3-mi, imm. 1-imi nr. 5-imi taaneqartumut Naalakkersuisut oqaaseqaataat ataatsimiititaliap tusaatissatut tiguaa. Aammattaaq taarsiissuteqartarnermut maleruagassat nalunaarummut inissinnerisigut pitsaaqqummut Naalakkersuisut oqaaseqaataat ataatsimiititaliap tusaatissatut tiguaa, tassani taarsiissuteqartarnek pillugu inatsisitigit inissisimaneq ajorseriassanngitsoq Naalakkersuisut oqaatigaat, tak. Nunarsuaq Tamakkerlugu Allakkerineq pillugu Isumaqatigiissummi maleruagassat, tamannali pissusissamisoorsorineqarpat inatsisitigit inissisimanerup pitsaanerulersinnissaa periarfissaalissaaq.

Aammattaaq Naalakkersuisut ataatsimiititaliap apeqqutaanut akissumminni manna oqaatigaat, *“Allakkerineq pillugu Inatsisartut inatsisissaattut siunnersuusiornermut atatillugu maannakkut peqqussummit allaanerusumik iluseqartitsisoqarnissaa Naalakkersuisut kissaatigisimavaat. Taamaattumik taarsiissuteqartarnek pillugu aalajangersagaq, inatsisitigit tunngavissanut aalajangersakkat takulertorneqarsinnaanerunissaat pillugu, inatsisip naggataaniikkunnaarluni, inatsimmi siusinerusumiilerlugu muunneqarpoq.”*

Tassunga atatillugu ataatsimiititaliap oqaatigissavaa tunngavissatut aalajangersakkat inatsimmi erseqqinnerulersinneqarnerannik malinnaaffigiuminarnerulersinneqarannillu Naalakkersuisut oqarnerat ataatsimiititaliap tamakkiisuunngitsumik isumaqatigimmagu, tassami taarsiissuteqartarnek pillugu erseqqinnerusunik maleruagassiortarnissamut Naalakkersuisut tunngavissaat piginnaatitsinermik aalajangersakkanut allanut arlalinnut ilanngullugit inissinneqarput taarsiissuteqartarnerlu pillugu kapitalip imaqarneragaanera kapitalimut qulequtsiussami ersernerluppooq.

Maalaarsinnaaneq

Maalaarsinnaanerup erseqqinnerusumik malittarisassiuunnissaanut pisinnaatitsissut inatsisissatut siunnersuummi § 22-mi allassimavoq. Ilanngussaq 1-imi taaneqartut maalaarsinnaaneq pillugu Naalakkersuisut malittarisassiornissaannut aalajangersagaq annertoorujussuarmik imaqartoq ersernerluttumillu tunngaveqartoq ataatsimiititaliap isumaqarpoq. Naak aalajangersakkamut nassuiaatit malillugit maleruagassat atuuttut allanngortinneqarnissaat siunertaanngikkaluartoq taamaattoq innuttaasut

maalaaruteqarnissamut pisinnaatitaaffiik – innuttaasunut aamma ajorseriaataasumik allanngortitsinissamut Naalakkersuisut annertoorujussuarmik periarfissinneqarput.

Maalaarutip tiguneraniit qaammatit pingasut qaangiutsinnagit Nunatta Allakkeriviata maalaarutiniq suliarinnittarnissaanik piomasaaqat nalunaarummut ilanngunneqarpat innuttaasut inatsisitigut inissisimanerat pitsaanerulersinneqassasoq ataatsimiititaliaq isumaqarpoq. Inatsimmut ullumikkut atuuttumut sanilliullugu maalaaruteqarsinnaanermut maleruagassat nalunaarummi aalajangersakkakut assut erseqqinnerulersinnerulersinneqartut ataatsimiititaliaq aammattaaq isumaqarpoq. Ataatsimiititaliarli Naalakkersuisut imatut oqaaseqaateqarnerannut tamakkiisuunngitsumik isumaqataavoq”.. *inatsisip ilusaa erseqqinnerulerpoq taamaalillunilu aalajangersakkat sulineranut periuseqarnermullu tunngasut siornatigornit takulertoruminarnerulersillugit nalunaarummut ataatsimoortinneqarlutik. Aamma "... malittarisassat sorliit nalunaarummiitinneqarnerannik paasisutissinneqarsinnaanerat siunnersuummi pitsanngorsarneqartoq."*

Maalaaruteqarsinnaaneq pillugu maleruagassat inatsimmi suli inissisimatinneqartuuppata taakku innuttaasunit pilertornerusumik takuneqarsinnaassasut pissusissamisoorussasullu ataatsimiititaliaq isumaqarpoq taamaalillutillu innutaasut maalaaruteqarsinnaatitaanertik paasisaqarfigissagunikkut inatsit nalunaarullu ataatsimut misissornissaat isumakuluutigissanngikkaluarpaat.

Siuliani pineqartut tunngavigalugit inatsimmi maalaaruteqarsinnaanermut maleruagassat, tak, nalunaarutissatut missiliummi § 21, ilanngunneqartut pillugit allannguutissatut siunnersuummik Naalakkersuisut pingajussaaneerinninnissamut saqqummiussaqaassasut ataatsimiititaliap inassutigaa.

Siunnersuutip aningaasatigut kingunissai


Siunnersuutip aningaasartuutiniq pisortanut kinguneqassanngitsutut iligimagineqarnera ataatsimiititaliap arajutsisimanngilaa.

Ataatsimiititaliap inassuteqaatai

Ataatsimiititaliap suliani inassuteqaataa tunngavigalugu allanngutissatut siunnersuummik Naalakkersuisut saqqummiussereerpata siunnersuut taama iluseqarnermisut Inatsisartut akuersissutigissagaat ataatsimiititaliap tamarmiusup inassutigaa.

Siunnersuutip appassaaneernejarnerata pingajussaaneernejarneratalu akornanni Attaveqarnermut Ineqarnermullu Ataatsimiititaliap siunnersuut suliareqqissagaa ataatsimiititaliap isumaqatigiittup inassutigaa.


Taamatut oqaaseqarluni isumaliutissiissuummilu allassimasutut paasinnilluni
ataatsimiititaliap siunnersuut aappassaaniigassanngortippaa.



Justus Hansen
Siulittaasoq



Olga P. Berthelsen



Debora Kleist



Anders Olsen



Malik Berthelsen